



M. Vinterhalter, Sarajevo

Što je postigao Savez sportskih ribolovaca Bosne i Hercegovine na unapređenju ribarstva u 1968. g.

Kao i prethodnih godina, i u prošloj 1968. godini, Savez sportskih ribolovaca Bosne i Hercegovine uspješno je realizovao svoj Program za sprovođenje mjera za unapređenje ribarstva. Iako ograničen u sredstvima, Savez je izvršio nekoliko vrlo korisnih akcija, a plodovi tih akcija više će se osjetiti u narednom periodu, nego u godini ikada su izvršene.

Komisija za unapređenje ribarstva SR BiH pripremila je za 1968. godinu vrlo sadržajan program mjera za unapređenje ribarstva. Programom su bile predviđene mjere za unapređenje čuvarske službe, poribljavanja ribolovnih voda, unapređenje proizvodnje u salmonidnim mrestilištima, akcija za suzbijanje parazitarnih i drugih oboljenja u salmonidnim ribogojnim objektima, nastavak ispitivanja planinskih jezera Treskavice i Zelengore i pružanje pomoći za čuvarsku službu i poribljavanje udruženjima sportskih ribolovaca.

Kao i ranijih godina, i u 1968. godini je bio raspisan konkurs za dodjelu nagrada za izvanredne uspjehe na zaštiti voda, čuvanju ribljeg fonda i uništavanju riblji štetočina. Nagrade su bile predviđene za društvene sekcije za čuvanje ribolovnih voda, čuvare ribolova i druga lica, koja se istaknu u čuvanju ribljeg fonda i za pripadnike milicije. Predviđene nagrade dodijeljene su najboljim čuvarima ribolova i društvenim sekcijama u aprilu 1969. god.

U prošloj godini Savez je uspješno realizovao republički plan poribljavanja ribolovnih voda, u koji se je uključilo četrdesetčetiri udruženja sportskih ribolovaca i drugih organizacija, koje se bave unapređenjem ribarstva i imaju na korišćenju riblji fond. Kroz zajednički plan poribljavanja Saveza u 1968. godini puštene su u ribolovne vode Bosne i Hercegovine slijedeće količine salmonidnih vrsta riba: 880.000 komada mladi potočne, mekousne i dužičaste pastrve, 60.000 komada dvogodišnje potočne i dužičaste pastrve, 22.300 komada mladi lipljana, 24.000 komada mladi glavatice i 7.000 komada mladi mladice. Valja naglasiti da iz godine u godinu raste broj udruženja sa nizinskih voda, koja vrše poribljavanje ciprinidnim vrstama riba. Tako je u 1968. godini u okviru republičkog plana poribljavanja 10 udruženja izvršilo poribljavanje svojih voda, sa 10.400 kg mladi i matične ribe ljuskavog šarana, soma, smuđa, linjaka, štuke i ostalih ciprinidnih vrsta.

Samo za realizaciju republičkog plana poribljavanja utrošeno je preko šezdesetpet miliona starih dinara. Komisija Saveza je vršila ugovaranja i nabavku mladi i matične ribe i obezbijedila vrlo povoljne uslove isporuke. Takođe je pružala pomoć udruženjima pri kvalitativnom i kvantitativnom prijemu ribe, transportu i poribljavanju.

Priznavanjem participacije udruženjima u troškovima nabavke mladi i transportnih troškova Savez je uspio da aktivira zamrznuta sredstva u fondovi-

SPORTSKI RIBOLOV I TURIZAM

ma za unapređenje ribarstva pojedinih udruženja, koja nisu korištena više godina. Savez je participirao u troškovima poribljavanja sa 15 do 30%, zavisno od vrste i uzrasta mladi sa kojom je vršeno poribljavanje. Najveći procenat praznavan je za poribljavanje dvogodišnjom pastrvom i deficitarnim vrstama mladi, kao što su lipljan, mladica i glavatica.

Programom mjera za 1968. godinu završena je akcija pružanja pomoći udruženjima na osposobljavanju njihovih mrestilišta za bolju i rentabilniju proizvodnju. U toku tri protekle godine izrađeni su elaborati: »Salmonidna mrestilišna proizvodnja, mjere na uvođenju savremenije tehnike i tehnologije u proizvodnji mladi za poribljavanje otvorenih voda i mogućnosti uporedne proizvodnje riba za konzum« za 15 društvenih mrestilišta. Elaborate je radio Biološki institut Univerziteta u Sarajevu, koji je u 1968. godini izradio elaborate za 9 mrestilišta, tako da je ova akcija definitivno završena. Na osnovu ovih elaborata preduzet će se mjere da se unaprijedi i poboljša proizvodnja u društvenim mrestilištima ili likvidiraju ona, koja nemaju uslova za ekonomično poslovanje.

Pošto su posljednjih godina pojedini ribogojni objekti imali velike gubitke u proizvodnji mladi, Savez je u okviru svog programa organizovao i finansirao akciju suzbijanja parazitarnih i drugih oboljenja mladi i ribe u salmonidnim ribogojilištima. Ovaj posao bio je povjeren istraživačkom institutu Veterinarskog fakulteta u Sarajevu, koji je stalnim nadzorom i pružanjem pomoći doprinjeo da je već u toku 1968. godine znatno smanjen gubitak mladi u proizvodnji. Institut je istovremeno izradio i Uputstvo za suzbijanje parazitarnih i drugih oboljenja u ribogojilištima, koje namijenjeno radnicima ribogojcima i koje je Savez obezbijedio svim ribogojnim objektima.

U prošloj godini nastavljen je i rad na ispitivanju planinskih jezera Treskavice i Zelengore, koja imaju poseban značaj za razvoj turizma u SR BiH. U tu svrhu sklopljen je ugovor sa Biološkim institutom Univerziteta u Sarajevu za trogodišnje ispitivanje s tim, da će ova akcija biti završena krajem 1969. godine. Ispitivanja treba da pokažu kakve su rezultate dala dosadanja poribljavanja planinskih jezera, što treba ubuduće preduzimati i kakav sistem gazdovanja i korišćenja treba da se zavede na njima. Izvještaj o ispitivanju u 1968. godini ukazuje na obim poribljavanja koji treba izvršiti u toku ove godine i u kojim granicama se može kretati izlov ribe u pojedinim jezerima.

Sistem naknada za obavljanje sportskog ribolova je kod većine udruženja sportskih ribolovaca takav, da ne može da obezbijedi dovoljno sredstava za zaštitu i unapređenje ribljeg fonda. Naknada za ribolovni dan je još uvijek daleko od ekonomske cijene, te su u naročito teškom položaju udruženja sa manjim brojem članova, a koja imaju, najčešće, najbolje ribolovne vode. Jedanaest malih udruženja, na čije vode dolazi veliki broj ribolovaca iz drugih udruženja, dobilo je u 1968. godini iz fonda za unapređenje ribarstva Saveza pomoć za čuvarsku službu i poribljavanje.